

02 SEP 1996
Sarawak-Mohamed
BN TIDAK TAJA CALON LAWAN, KATA MOHAMED

KUCHING, 2 Sept (Bernama) -- Perdana Menteri Datuk Seri Dr Mahathir Mohamad dan Timbalannya Datuk Seri Anwar Ibrahim tidak menyokong mana-mana calon lawan pada pilihan raya Sarawak 7 dan 8 Sept ini, kata Setiausaha Agung Barisan Nasional (BN), Datuk Mohamed Rahmat hari ini.

BN, sama ada pada peringkat pusat mahupun Sarawak dan pemimpin-pemimpin komponen parti memerintah di kedua-dua peringkat itu, tidak merestui mana-mana calon lawan pada pilihan raya itu, kata Mohamed yang juga Menteri Penerangan dan Setiausaha Agung Umno di sini.

"BN tidak akan mengambil calon lawan ke dalam BN jika mereka menang sekali pun," katanya sebagai menafikan dakwaan beberapa orang calon Bebas kononnya mereka mendapat restu daripada Perdana Menteri dan Timbalan Perdana Menteri untuk bertanding.

Calon-calon itu juga pada kempen mereka dilaporkan berkata kononnya mereka akan menyertai BN jika mereka dipilih. Sebanyak 60 calon bebas bertanding di 38 daripada 43 kawasan yang masih menjadi rebutan. BN memenangi 19 kerusi tanpa pertandingan pada hari penamaan calon Selasa lepas.

"Saya bagi pihak Perdana Menteri dan Timbalan Menteri serta Umno dan komponen parti BN yang lain ingin menafikan sekeras-kerasnya kononnya mereka menyokong atau merestui calon lawan," kata Mohamed. Anwar dijadualkan tiba Khamis ini untuk menyertai kempem BN dan mematikan dakwaan itu.

Beliau bertanya mengapa harus Dr Mahathir dan Anwar serta pemimpin-pemimpin lain membantu calon lawan memandangkan hubungan dan kerjasama antara Ketua Menteri Tan Sri Abdul Taib Mahmud dengan pucuk pemimpin pusat adalah amat baik.

"Hubungan dan kerjasama antara Kerajaan pusat dan kerajaan negeri juga begitu rapat sekali dan banyak projek besar dibawa ke Sarawak," katanya.

Katanya pemimpin-pemimpin pusat yakin dengan pucuk pimpinan di Sarawak dan Sarawak nampaknya mempunyai potensi untuk terus maju dan sekali gus menyumbang ke arah hasrat menjayakan Malaysia Maju bagi menjayakan Wawasan 2020.

Mengenai dakwaan kononnya usaha sedang dijalankan untuk membawa Umno ke Sarawak, Mohamed berkata: "Umno tidak akan datang ke Sarawak sekarang atau pada masa akan datang.

"Umno tidak perlu datang ke Sarawak. Sarawak tidak menghadapi masalah dan hubungan antara Umno dengan PBB (Parti Pesaka Bumiputera Bersatu) amat erat," katanya.

Mohamed yang tiba malam tadi untuk lawatan sehari berkata beliau berpuas hati dengan kegiatan jentera pilihan raya BN setakat ini dan sokongan serta kerjasama komponen parti BN negeri untuk menentukan BN memenangi kesemua 43 kerusi yang dipertandingkan itu.

Mohamed menyaran kepada pengundi supaya keluar beramai-ramai untuk menggunakan hak mereka dalam menentukan sebuah kerajaan yang kukuh.

Mengenai rayuan calon-calon lawan untuk mendapatkan simpati pengundi dengan menyatakan bahawa Sarawak perlukan pembangkang, beliau berkata apa yang penting ialah negeri ini mempunyai kerajaan yang kukuh bagi kesinambungan pembangunan negeri dan negara. -- BERNAMA

SJA NMO